

Comunicado Skirbi pa Clyde Harms

Un reto na esun cu ta kere cu Mazoneria ta un organisacion diabolico

ORANJESTAD -- E destruccion di e monumento di Mazoneria di Aruba siman pasa a genera basta publicidad. Ami a kere cu nos pueblo, respetuoso di propiedad priva ahenor, lo laga nan bos resona condenando e vandalismo bergonsoso di algun miembro di nos comunidad. Mi a keda desapunta. Mi no a tende ningun lider politico, religioso, comercial of cultural, expresa publicamente nan indignacion pa e acto vil aki. Den un noticiero digital tabatin hopi comentario di lesadonan, pero pa mi engaño, mayoria tabata pa aplaudi loke algun a yama “un bon trabou,” conectando e acto vulgar di e antisocial cu slogan di un partido politico cu si a haci un bon trabou segun e pueblo cu a duna e un victoria aplastante.

Ami ta un Mazon. Mi ta harta di tende of lesa cu Mazoneria ta un organisacion diabolico of satanico. Es nan cu conoce mi sa cu ami hamas lo a join un organisacion cu no ta mantene su mes na e balornan di mi y di nos isla. Mi ta spera cu e articulo aki lo aclaria e mal entendimento cu ta bruha algun miembro di nos comunidad. Na es nan cu ta sigui pretende cu Mazoneria ta un organisacion diabolico of satanico, mi ta reta nan pa trece prueba di esey un acto diabolico of satanico cu un logia mazonico aki na Aruba por a comete desde cu Mazoneria a drenta Aruba 94 aña pasa.

Ironicamente, algun di es nan cu a comenta den e corant digital ta acusa Mazoneria di traha den secresia mientras cu nan mes ta sconde tras di un nomber ficticio. Mazon-



Tur Logia mazonico na Aruba ta identifica nan mes, nan no ta traha den secresia

nan no ta traha den secresia. Tur logia aki na Aruba tin borchu cu ta identifica nan mes. Na aña 2005 Logia El Sol Naciente a cumpli 85 aña di existencia y e miembronan a marcha den dia cla te na e monumento Mazonico na LG Smith Boulevard caminda varios a tene discurso pa tur hende tende. Por cierto ami a skirbi un articulo cu a sali riba dos pagina di e corantnan local, na Ingles y Papiamentu. Ki ora cu tin un entierro na Cementerio Acacia, centenares di ruman ta congrega na e sitio, bisti orguyosamente cu nan delantal pa tur hende mira y hendenan cu no ta Mazon tambe por ta presente.

Mazonnan semper a lucha contra dictadura, inhusticia y sufrimento. Mayoria di e firmantenan di e Declaracion di Independencia di Merca, incluyendo George Washington, tabata Mazon. Mayoria di a heroenan Venezolano dera den Panteón di Caracas tabata

Mazon. Martí, Libertador di Cuba, San Martín di Argentina y O'Higgins Libertador di Chile tabata Mazon. E famoso escritor Hulandes Edward Douwes Dekker a skirbi e buki Max Havelaar pa protesta contra e abosonan y inhusticia di e colonialistanan Hulandes na lo ke awe ta Indonesie. Wolfgang Amadeus Mozart a skirbi “Die Zauberflöte” (E Fluit Magico) como protesta contra e persecucionnan di e Emperatriz Marie Therese di Austria. Lidernan di e Revolucion Francesa a brasa e idealnan politico di e escritor Mazon Jean-Jacques Rousseau. Henry Dunant a inspira e fundacion di Cruz Cora Internacional pa combati sufrimento di e victimanan di guerra.

Hopi homber famoso di tur parti di mundo ta, of tabata, Mazon. John Glenn, e prome Americano a bay den espacio ta un Mazon, mescos cu Edwin “Buzz” Aldrin kende, hunto cu Neil Armstrong,



E monumento mazonico cu desconocinan a destrui siman pasa. Foto di archivo

tabata e prome dos hendenan cu a cana riba luna. Ludwig von Beethoven y hopi otro musiconan famoso den ultimo siglonan, di Sibelius te “Satchmo” Armstrong tabata Mazon. Den arte, literatura, deporte, ciencia, negoshi, medicina, politica, gobierno, ehercito, realmente den tur faceta di esfuersonan humano, Mazonnan a haci un diferencia. Na Aruba tambe Mazonnan a distingui nan mes y gana respet y admiracion den comunidad pa nan trabou pa nan merito y pa nan liderazgo den comunidad. Hopi Mazon a wordo reconoci y honra pa gruponan civico, cultural y deportivo. Reina di Hulanda a yega di condecora mas di shen Mazon na Aruba den Orde di Oranje Nassau. Actualmente ainda tin por lo menos diesdos Mazon na bida cu a yega di wordo condecora. Un di e principionan di Mazoneria ta caridad pa cu es nan cu tin necesidad. Na Merca mazoneria ta contribui e ekivalente di mas o menos cuatro miyon dollar pa dia, si, pa dia. E placa aki

ta bay specialmente pa cuida medico gratis na 19 hospital di kemadura (Burn Institute) y 3 hospital pa muchanan mutila (Crippled Children) na diferente parti di Merca. Aki na Aruba un logia ta yuda es nan den necesidad, specialmente muchanan; esaki si, anonimo.

E monumento Mazonico cu e anti social a destrui a wordo desvela na 1990 como parti di e celebracion di 70 aña di El Sol Naciente y ta dedica na L.J.M. “Nadi” Henriquez, e prome venerabel maestro. Tambe tin dos estatua di Mazon na Aruba. Uno ta di Lloyd G. Smith dilanti di Cas di Cultura. E ruman Lloyd tabata miembro di El Sol Naciente pa hopi aña y tabata un di e fundadonan di Logia King Solomon. E otro estatua Mazonico ta di e Mazon mas famoso di Zuid Amerika: E homber monta riba cabay dilanti di Sociedad Bolivariana: General Simon Bolivar. Manda bo comentarionan cu bo nomber (no nomber scondi), pa clyde-harms@yahoo.com. □